

: أغاني على حدود الوجد

: منى المنير

: شعر

: 96

: 6

: 20 × 14

: الطبعة الأولى

:
:
:

التوزيع والنشر
دار البشير للثقافة والعلوم
مصر
darelbasheer@hotmail.com
darelbasheeralla@gmail.com
ت : 01152806533 - 01012355714
جميع الحقوق محفوظة

دار البشير للثقافة والعلوم



1436 هـ
2015 م

أغاني على حدود الوجد

شعر

منى المنير

دار البشير
للثقافة والعلوم

الإهداء

إهداء إلى ساعات الوجد ..
وكل الذكريات المؤلمة ..
شكرًا فقد كنتم النبع الذي شربت
منه فقواني وشد عودي ومنحني
القدرة والمواجهة والثبات لباقي العمر



بسم الله الرحمن الرحيم

حرف سڭينة

وطن..
وفيه كلنا
والقلب له مسكن
يا وطنًا يا صابر
ضم الضنا مقابر
والفرح مش خابر
سكة لوادينا
ولفين مودينا
يا سارق الأوطان
رايح وجاي بينا
على حرف سڭينه
شريان أيادينا

مفتوح بقالنا زمان
ينزف وييسر سب
ولا حد بيطبطب
واللى قالوا لنا طيب
قَطَّع باقي الشريان
لكن يا وطني... هعيش
وانفش بواقي الريش
مهما يقولونا مفيش
الخير ده جوانا
الخير ف دعوة أم
وف أب قلبه يضم
أو شاب متربى
ع الطيبة والتقوى
وبلادنا بيه تقوى
وتعلي ف البنيان

ما هم قالولنا زمان
الأصل دا غالب
والمصري مش طالب
غير عيشة بكرامة
ما هو واد نبيل وأصيل
لو مرة بلده تميل
بدراعه يعدلها
يسندها ويشيلها
وتعيشي يا غالية
فوق الجميع عالية
وتعيشي يا مصرنا
والبسمة ف عيونك
والبسمة ف عيونك

أصل

وليه نحزن!
وليه نقفل شباييكننا..
في حكمة تفوق مداركنا
ورب الكون مدبرها
ودا لو خير
هتلقاه جاي على بابك
هيتشعبط على تيابك
بدون أسباب



عيلة

سلام رقيق محسوس
 رشرش على بيتنا
 والدمع لو مرصوص
 نمحيه بلمتنا
 هتشيله إيد الأم
 وقلوب كثير بتضم
 والأب لو يهتم
 بيبكون حيطان الصد
 كل الهموم تتهد
 من غير سؤال أو رد
 يجري عليك و أوام
 راح يعدل الأيام
 ويشيل ثقيل شيلتك

ما هي دي يا واد عيلتك
 ساعة العوز تتلم
 دمك لأهله يحن
 تضحك بيان السن
 تصغر كثير ف السن
 يبجي الغزول و يسن
 عينه مع سنانه
 نفسه يشوف دمك
 يا ابني الإله سامعك
 ارفع إيديك الاتنين
 وادعي وكون له أمين
 يكفيننا شر العين
 ويخلي لمتنا
 ويديم محبتنا
 نور الرضا ف بيتنا
 و ف مصر والسامعين

قطع خيوط الشرنقة

قطع خيوط الشرنقة
 قطع وطل هتلقى نور
 قطع بلاش ف الغيم تدور
 دا الشمس واضحة حتى بص....

غريبة

تعيش مخدوع
 وبإرادتك
 يا أعمى فوق دا من خيبتك
 ما فيش ع الأرض حد ملاك
 ولو دورت..
 هنا وهناك
 هتلقى ناس قلوبها هلاك
 ولا بسة توب من الطيبة

قرار

ما تزعلشي
 دا مهما دامت الضلمة..
 هتيجي الشمس تمحيها
 وممكن تلقى إيد حانية
 بشمعة تفرحك بيها
 مفاجأة.. صح؟
 لكن مش صح
 بإنك كل يوم الصبح
 بتقفل شبابيك
 تعيش مسجون داخل ضيقك
 وتمشي تلف منحنيات
 تلف ف دايرة م الآهات

وتندب حظك اللي خان
 و ناس ماشيين كما العميان
 طابور مربوط بحبل الذل
 طابور ساحبه إمام مختل
 ولو نور الحقيقة يهل
 يغموا بسرعة ف عندهم
 يشدوا الحبل ف أيديهم
 يتبتوا فيه..
 و طيب ليه؟..
 تكون منهم
 دا عيشتك لو ماليها المر
 بايدك حلي في مرارك
 كفايه إنك انت اخترت
 ما فيش ظالم بيشرط شرط
 و يقولك تعيش إزاي

وبيحدد تموت إزاي

كما المملوك

تعالى وعيش كما الأحرار

عليك تختار

يا تربط حبله ف رقبتك

يا إما تكون كما الإعصار

على الدنيا

تغير وشها ف ثانية

تهد قصورهم الفانية

.....

أوام تنهار

ساعة ما تقوم تواجههم

ويبقى قرار.

وردة

فتحي يا وردة.....

واوعي تقفلي

بطلي المناهدة.....

قلبي مش خلي

فتحي وهاتي لى...

نسمه حينة

وتعدي يوماتي

ف بيوت حينا

تسعد الحزين..

تمسك الإيدين

وتضخ السعادة

جوا الشرايين

فتّحي جمالك

خلي حالنا حالك

جوا قلوبنا بهجة
 مغزولة بخيالك
 فتّحي كفاية..
 دمع الكون بحور
 سيل ما لوش نهاية
 ييهّد أقوى سور
 والقلوب حزينة
 والفرح ف واديننا
 زي شئ خرافي
 والأراضي بور
 من زمان يا وردة
 واحنا مجروحين
 جه الأوان يا وردة
 يفرح الحزين
 فتّحي يا وردة
 وفرحي السجين

هموم

القلب شايل م الهموم ألوان
 بس بياضه عمره ما اتعكّر
 والشكوى تحرم إلا للرحمن
 ومين لغيره اشتكى..
 بكره هيتحسّر
 هوا اللي يمحي الألم
 والظلم والأحزان
 لو تلتجيء لحماه
 لو.....بس تستغفر

نصيحة

صاحبت الألم ورؤيته
 ما أنا غلطانة لو سبته
 يكون حاكم
 حياتنا شروق وبعده غروب
 و قلبي لو يبات مغلوب
 أهو أحسن من اللي يبات كده ظالم
 كثير أحلام بتتحقق
 ما دام واثق وبتصدق
 و للرحمن تروح تلجأ
 ما هوا القادر العالم
 لكن فاضل عتاب واحد
 با أقوله للي ماشى في وسط الناس

بيسقيهم مرار الكاس
 أقول له بس: خد بالك ..
 ده كله بيكتبه الحراس
 و ظلمك لينا مش دايم
 قلوب الناس ماليها الخير
 تدور راح تلاقي كثير
 يحاوطوك لو .. وقعت كسير
 و ترجع وسطنا .. سالم
 يارب تكون بقى فاهم .

ليه؟!!

وليه دايمًا....

يا مصر تسيل

دمانا واحنا بنحرر

إيديكي منقيود الذل؟

وليه لازم عشان نرفع

جبينك ..عينا ليه تطلع

نفارق كل غالي و خل؟

وليه الناس

بتبدر ..شر؟

قلوبهم ليه ماليهاالغل؟

وناوين ليه يزيدوا الكسر

ف قلوبنا

وليه الورد

يا غالية بيتكفن

آهين يا دم يا سايل فى نهر النيل

مسيرك يوم ..

هتطرح يوم زهور ونخيل

وهتضلل على بلادي

وهتحوط على ولادي

وتفضل مصر ست الكل

وهيدندن لها الموال

وساعتها..

مايفضلشنى فى حياتنا سؤال.

يا رب

يا سابل سترك اهدينا

تاهت منا خطاونا

ما بين ممنوع وبين مسموح

نلاقي الذنب فين ما نروح

بيتجمل ..

ويتزين ..

وما دد إيده لإيدينا

يا سابل سترك استرها

وصبرنا وعدّلها

وخلي التقوى والإيمان

تقوي النفس ع الشيطان

وكل وضوء... نطهرها

من الأدران

رحيم رحمن

عزة

ماشي الطريق وحدي

ورامى حملي ع الرحمن

وزادي م القليل يكفي

أنا دائماً أبات شبعان

وما دمت أنا راضي

وإيماني دا زوادي

وحتى جيبني ولو فاضي

ده عمري ما انحنى لإنسان

مصر

طرزت روحي من نسيم ليلك
 حتى الغيطان حاكيا لي مواويلك
 والنجمة صاحبة معشقة ف نيلك
 من يوم ما شفتك صرت م المردين
 جربت أبعد قلت هانساكي
 لقيتني ناسي قلبي وياكي
 أصل الحقيقة إن أنا...
 فطموني بهواكي

ماراثون

اجري يا وحش
 اجري ما دام سحرك ما نفعش
 ولا سهوكتك
 ولا نحنحتك
 اجري وجري معاك العرش
 سيبك م اللي بايت جوعان
 واللي النور عنده طفشان
 واللي الميه قاطعة ف بيته
 سيبك م اللي تحت الكوبري
 نايم قايم دمه بيجري
 سيبك م اللي اتمرط بدري
 علشان لقمة

مسح الجزمة

وعشان عيلته وفر قرش

سيبك من خريج الجامعة

وشهادته ع الحيط مش نافعة

لا هو عارف يصرف على نفسه

ولا عارف يسكنه ف شقة

سيبك.... عربد

تلقى كتير لجنابك يسجد

إنت و شعبك اللي انتخبك

بس هاقولك..

كلمه ف ودنك

عمر بلادي ما كانت مالك

ولا أراضيه كات أطيانك

جاية الثورة ومش هتسبب

جاية الثورة تهز العرش

وتزلزل أركان الغش

جاية وجاي معاها طوفان

هيجرف ظلم الأوطان

من أمثالك

واللي ظلمنا يبقى اختار

قرب هلاكه

قلبي انفطر

قلبي على مصر انفطر
 وقلبيهم زي الحجر
 كل أما تيجي تتعدل
 يكعبلوها تتعتر
 كل أما ينشف دمعها
 ييموتولها كام نفر
 تيجي تططب ع الجدع
 تلقاه من القهر انتحر
 حلم الولاد ترجع لهم
 وتمد إيدها تضمهم وقت الخطر
 فيرددوا قلبي على مصر انفطر
 وقلبيها برضه انفطر

وتتللم

وبنجمع بواقى الحلم
 وننفض غبرة الأيام
 وبنفتح شبايكنا
 وبنخلص معاركنا
 مع أول نسيم الصبح
 ترفرف روحنا وتسينا
 تطير وياه
 تدوب جواه
 وتطلع للسما السابعة
 وفجأة لحضننا راجعة
 بباقة فل
 وحبة ورد م النادي

وقلب جديد كده هادي

وعود ياسمين

وللغاليين

شوية حب م المخصوص

ورغم الحزن كان مرصوص

بحبة طيبة يتبدد

بيتهرب.. بعيد يبعد

وضحكة سن نونو جميل

تخلي الفرح ييجي يميل

على بيتنا

على الشارع.. على الجيران

وروح يا حزن

فارقنا

ما عادشي ليك ما بينا مكان

كفاية.... فارق الأوطان

و فارقنا

و بتضلم... تسد نفْسنا

تخنقنا

و نتألم...

ويجرح دمعنا خدودنا

مفيش منفذ

يدخل لو شعاع واحد

وروحنا خلاص بتتأخذ

لكن رحمة إله الكون

تطبطب ع الفؤاد وتكون

كما البلم

ونتبسم...

ونحمد له كثير فضله

ونشكر له عظيم ستره

دموع الفرحة تسجد له
تداوي كل أحزاننا..
تداوي كل أحزاننا

سكوت

وحتى الصمت كان مبهر
وبسكوته كسر أصنام
ماهو المصري أكيد يقدر
بأيده يحقق الأحلام
بأيده يشق كل ضلام
وقوم يا مصري واتحرر
دي مصر الغالية تستنظر
وشايفة الفرحة جوا عنيك
وإيد الكل ماسكة إيديك
طوفان هادر
يزيح الخاين الغادر
وينهى حكايته م الآخر

ونحكيها ف كل زمان
 قصاد الغاوى للسلطان
 نصيحة جوه وجدانه
 ما عادشي الظلم دا أوانه
 وهو صحيح كده ينفع
 بلادنا الحلوة تتوزع
 ولادها يعيشوا متخاصمين
 وطيب مين
 يصلحهم؟
 ومين ف الأزمة ينصفهم
 ياريت فى الحق نتعاون
 ونزرع شتلة الياسمين على بيوتنا
 ونتمتع بعطر الحب فى قلوبنا

شعاع شمس

شقشق شعاع الشمس
 قالي كلام كالهمس
 بلدى خلاص هتزيح
 كافة أعاديها
 مصر الجميلة تقول
 كلمة تهز عقول
 يقف العدو مذهول
 ويخاف يعديها
 مصر الأمل والخير
 والمصري أصله أمير
 لما مراكبه تسير
 بالنور يوضيها

وانا مهما أقول ما اشبعش
 وإزاي يا ناس ما اعشقش
 قلبي يوزع بس
 الخير ويرضيها

حر

حلو الكلام خداع
 كم حق لجله ضاع
 والشخص لو متباع
 هيبيع أبوه وأمه
 والحر ما يبعشي
 بلده ولو بالذهب
 قول الكلام بالأدب
 بانت كده القصة



شبابيك

لا هتسول

ولا من طبعي أتحول

ولا اعرف أشكي وأولول

وحقي هجيبه بدراعي

ماهو الراعي

إله الكون مقويني

ونور قلبي مخليني

بامشي وروحي على كفي

ومش هنفي

بإني ناوية أنا أنزل

ودمعي خلاص ما عاد ينزل

على أحبابي

ولو بابي

مضلمها

راح افتح للضيا شبابيك

وروحي تحفظك تحميك

ما انا أصلي

يا مصري

بحب اللي بيعشق مصر

في كل زمان في أيها عصر

هتفضل تاج على جيني

هواها الحلو يحييني

يرجع روحي تنسم

وتبسم

لحد الخير ما هينسم عيره

يحضن الأوطان

في كل مكان

ورقة وقلم

وساعة ما ألمح قصائد الورق
ألاقي مشاعري ...
بتسبق أيديا..
بتجري ف عروقي
وتعمل سبق..
وآه لو لمحت قصائد القلم
بتطرح ورودي
ولوم العدم
وتلمع نجوم
وبتقول لي قومي
نزور الجنان
نشم الزهور
وف ايدينا يطرح

على الدنيا نور
معاه الخيال
وكل الجمال
ماهي الكلمة أصلا
بتروى البحور
وفيها اللآلىء
وفيها اللي غارق
وفيها اللي يحفر
كلامه الصخور
وفيها جواهر في بطن المحار
دي عاوزه لها فاهم وصاحب قرار
يقول الحقيقة
بكلمة هيبني من العز دار
يلم الحبايب
وحتى اللي غايب
هيلقى له مسكن وأهل وعمار

وأما اللي جار...
وبالكلمة موت ولادي الصغار
وزيف وخبي حقايق كتار
نهايته بكلمة
شباب مصري قادر
يرجع بلاده...
ولو حد ساده
ما يقبل يكون مع المفترى
ولا يوطي راسه
ودايماً مداسه
بيطحن دماغ كل من يتتوي
يهين أي مصري ..
ومهما يعافر
يحاول يصادر
بكلمة هترجع بلادي عزيزة
ما هو الحق قادر
كده الحق قادر

ربك مُطَلَع للغلبان

تعالى يا واد..
ف جلبى حديث
ف جلبى وجع..
أنا اللي عشانك عملت البدع
سهرت الليالي ضربت الودع
وجوعت نفسي...
عشان كان ف نفسي
أشوفك كما الوحش تحمي البلد
ويا ما دعيته يجينى الولد
وكان اشتياجى..
تيجيلي ولا بس ف رجلك بيادة
يجولوا البلد عنا إحنا السيادة

يجولوا دا زين الرباية الأكادة
وحامي الوطن..
ودا اللي علينا كريم مؤتمن
وفرّحت جلبي
وشفتك يا ولدي
في جيش الوطن
وضابط وجندي
ما فيش حد جدي
تعالى اما اجولك يا واد كلمتين
يا واد كون لبلدك محافظ أمين
ولاءك لوطنك ماهوش لاي حد
فداه اللي غالي فداه الجسد
ولو غرجوك في عز ودهب
ما تعطي بلادك لمن يستبد
فاهمنى يا واد؟

دا رب العباد.. حبيب للغلاية
وخابر كويس
ده مين اللي زين .. ومين الديابة
وشاهد وعارف بكل اللي خافي
يا ابو الجلب أبيض .. حنين .. وصافي
يا عاشق بلادك..
هواها دا زادك
يا حامي خواتك ف وقت الخطر
بإيدك بلادك دي راح تنتصر
تضوي طريق كله ضلمة وليل
ووش الزمان العتيق الجميل
يراجب خطاها
ويلمع ف عينه ضياها وبهاها
وترجع عزيزة بولادها وناسها
وكل اللي خانوا يدوسهم مداسها
دي مصر الوطن

عميان

ماشين كما العميان
 ف رقابنا مليون حبل
 قلبي وجعني زمان
 دلوقتي ما لهوش حل
 غير إنه يبقى الدليل
 قطع حبال الذل
 ناوي يعيش إنسان
 لو حتى قالوا.. إختل

هتفرج

واقف بطولي وانا..
 ما املكشي غير توبي
 ساعات يجيني الهنا
 ويكونلي مكتوبي
 واما ف يوم بانكسر
 والاقى صاحبي غدر
 دوغري أقوم وأفز
 وأهز حظي هز
 أنا يا عبيط ما اركعش
 أكسر وما اتكسرش
 رجلي صحيح ع الأرض
 بس الفؤاد طاير..
 بيجيلي ويسافر

يسبح مع العصافير
وساعات يبتقى أمير
الكون يكون عرشه
الفرح بيرشه
على كل كل الناس
ما الفرحة دي عدوى
للناس بنقلها
تفضل مواويلها
ذكرى بتشجينا
يعدل مسار القلب
الروح قوام بتدب
يرجع كانه شاب
نادي كما الأزهار
يرجع قوي وجبار
ع الظلم والأحزان

نسب

يا اللي نويت النسب
روح ناسب... الأصلة
تلقى قلوب من دهب
ما يكونوا يوم رزله
بنت الأصيل... تحفظك
وتهفظ العشرة
تسوى بعقل وأدب
ومن الرجال... عشرة
لو غبت يوم عنها
بيتك يكون... جامع
على راسها وف قلبها
تاج العفاف... لامع
هتشيل تقيل همك

وتقرّب لها أمك
كله عشان خاطرك
ما اللي يحب الجدع
يعشق طرّف طرّفه
ماهو برضه يا ابن الناس
بنت الأصول دي أساس

لامؤاخذة

الحلوه دي... قامت تعجن ف الصبحية
والنفس صافية والطلعة... حلوة بهية
راحت تجيب حبة ميه... م الحنفية
لاقتها فاضية ولا نقطة... منها بتنزل

عشانها ناصحة وبتخزن... ميه ف الزير
قالت خلاص عندي الميه.... وبلاش تبذير
راحت على البقال بدأت... بصباح الخير
جاوبها قال الخير فارق... من عمول

قالتله طب هاتلي يلا... كام كيلو دقيق
قال الصوامع فضوها.. في القلب حريق
على الغيطان اللي بارت ما عادتشي تليق

وبنوها بالطوب الأحمر وأنا إيه أعمل؟

راحت على الفرن ووقفت كده ف الطوابير
عشان تجيب عيش وتَفْطَّر ما عيالها كتير
لقيته محروق ومعبي جواه مسامير
قالت نشيلهم ونغمس وبلاش نزعل

راحت على الدار لامؤاخذه
تَصَحِّي فيهم..دي مناهدة
قالت خلاص خليكوا نايمين
راحت تشوف التلفزيون

ما لقتش كهربا موجودة
وصَوَّتت: أيام سودة
ربطت دماغها وجالها صداع
دخلت ونامت ف الأوضة

تاج

ياما قالولنا زمان
إيش تعمل الماشطة
ف السحنة لو عكرة؟
وايش يعمل الفلاح
ف الأرض لو بايرة؟
وايش يعمل السفاح
ف شعوبه لو ثايرة؟
مهما الضلام عشنش
برضوا الحياة سايرة
لازم هتطلع شمس
تمحي ضلام الأمس
تزرع أمل بكره
أصل الكفاح فكرة

م الخاين المؤتمن
حنى إيديه بالدم
النار بتولع.....
لَمَنْ؟!!

نبتت ف قلب شريف
أما اللي قلبه كفيف
يفضل ف عز النور
ماشي كما العميان
ودي سنة الأزمان
إن الخسيس لو خان
لازم ف يوم يتخان
يفضل ذليل متهان
وف حضرة الرحمن
عمله يكون سابقه
والحسرة في قلبه
نفسه يعود تاني
ما يكونشي يوم جاني
بس الأوان كان فات
والعفو وقته مات
ده وقت دفع التمن

أخويا

وعدتك يا اخويا أكون لك سند
 ف وش اللي كارهك.....
 واكون لك مدد
 ولو خيروني بمال أو ذهب
 باسمك يا غالي راح أنطق و أرد
 وعدتك ما هو انت اللي فضلك سبق
 ولو شفت حزني بقلبك ترق
 وتجري عليا ومن غير سبب
 بتاخذ إيديا ويا دي العجب
 يزول كل همي بلمسة إيديك
 ودمعي اللي سايل .. في لحظة هرب

هتفرج

ضاقت ولما اتخنقت
 لفتني بحبالها
 ما عدت لاقى نفس
 ودموعي تحلالها
 لكن فؤادي سبق
 الضيقة و حایلها
 بص لآله السما
 ونجومها وجمالها
 ما يوم طلب مرحمة
 م الناس و أفضالها
 فجأة لقيت رحمة....
 على عمري بتمطر
 وملايكة شايلة الهنا

ف كتابي بتسطر
افرح يا داعي الإله
ما هو ربنا أكبر
م الضيقة والأحزان
أكبر من السلطان
واللي يبات زعلان
ندعيه وهاتُفرج

ضنا

القلب لما اتوجع
داويته باللمة
طول عمره جد وجدع
ما وجعني غير لَمَّا
ضنايا شفته وقع
راح الفؤاد سما
عمل عشانه البدع
وانزاحي يا غمة
داعياه طول النهار
داعياه ف الضلمة
يفضل لعيني النظر
احميه يا رب البشر
على طول يكون منتصر
واجمعنا ف الجنة
واجمعنا ف الجنة

قالوا التزم أهلك

لو تبتعد تَهْلِكْ

أمثال قالوها زمان

حُطُّ الغريب ك اهلك

هِيحَطْ عَلَيْ كَاهْلِكْ

حموله والأحزان

يا بني دا من جهلك

بِتَحِبُّ مِنْ جَهْلِكَ

ومفكر غلبان

قیمتک ما بین ناسک

اكتب ف كراسك

الأهل يعني أماااااااااااااااااا

يكفينا شر العين

أَوْ شَرِّ حَسَادِنَا

وان قل زوادنا

على الجميع يتقسم

أصل الرضا دا اترسم

جواقلوب الكل

يطرح ف ورد وفل

یملا حیاتنا ضل

يملاها بالفرحة

والفرح دا بميعاد

بسمۃ ف عیون تنقاد

تَفْرِح بِبَسَاطَتِهَا

واللّٰمة حلّتها

ده الفرح لو يتباع
 نجم السما اللماع
 يبص يتبسم
 نسمة هوا تلملم
 ريحة الورود بينا
 تدعي الإله لينا
 يا رب تنشر سلام
 يسعد أراضينا

هنا

داقت نفوسنا الهنا
 والنفس طماعة
 بعد التعب والضنا
 نرتاح ولو ساعة
 والساعة مش حظنا
 دي الساعة خداعة
 لحظة ألم كالسنة
 تقتلنا ببراعة
 وتقولى ما انتو السبب
 عاملانا شماعه

مواجه؟

وليه تكتم نفس طالع
وبتقلب لي ف مواجه
وكنت خلاص راح انسأها
دا كتر الكتمة يا فالح
ماهيش م الحكمة والصالح
وساعة الجد تلقأها
بتتفجر كما الزلزال
وهوا الظلم برضه حلال؟
وليه الكلمة تخشأها؟
يا خايف من ضيا الفكرة
هتطلع برضه لو بكره
ما هيش لمبة هتطفئها

يا أمّه

يا أمّه
ضاعت خطاوي القلب
فين التقي لك درب
يجمعنا لو لحظة
ترقيني بالكرسي
وتلملمي نفسي
وتبخري لنا البيت
يا غالية انا اتمنيت
نورك يضوي الليل
يا قصة ف المواويل
دايمًا بتحكيها
يا روح ما ليها مثل
عأيش حياقي عليل

وحشاني يا حبيبة
يا نبع للطيبة
ونهر خير وحنان
فاكر مانيش ناسي
صبرك على جناني
وانا طفل وأناني
يا ضحكتي الحلوة ...
ولقمتي السخنة
واللمة ف السهرة ..
ما اللمة كنتي انتي
والفرحة برضه انتي
وحتى ف الشدة
واقفة وبتصدي
والأزمة بتعدي
والبسمة على وشك
وحدودك الوردي
وحشاني يا أمي

وحشاني يا ضمة
وطبطة إيدك
حكاويكي وعودك
إن اللي جاي أجمل
ومسيرها تتعدل
ربك يا واد أعدل
من كل كل الناس
شايفك يا روح الروح
رغم الفؤاد مدبوح
شايفك كما الفارس
شايفك ملاك حارس
يبعد ويبجلنا
طاير بيدعيلنا
والدعوة يا غالية
هيا اللي باقيه لنا
هيا اللي باقيه لنا

راضي

انا الراضي بحكم الله
 ماشي ف نوره وراجي رضاه
 لا انا باشكى
 ولا ليا في كلمة آه
 ولو نقصت معاي مرة
 بكون راضي
 ووسط ظروفاك الصعبة
 أنا راضي
 لكن لو حية تتلوى
 على بلادي
 أكون مارد
 أكون الرمح والساعد
 أكون إعصار..

مع الظلمة أنا جبار
 وأفعضهم كما الصرصار
 دا انا المصري
 أنا اللي كل ما فيا
 فدا بلدي
 أنا المزروع ف أراضيه
 وبالبلدي
 تروح الروح وما اسيبها..
 تضيع مني

أمانة عليكى

طول عمرنا ف صراع
وبين لقا ووداع
القلب دمعته بحر
وانا دمعتي قريّة
يا مصر يا حبيبة
لكي ف الزمان هيبة
صايبة العدا بالقهر
سكنتيني كما الجني
جمالك دا مجنني
وانا المسحورة ف رحابك
وشايفة الطيبة ف عيونك
بتبدر خير على احبابك

وبسمة روحك الصافية
ساعة ما تهلي... تأسرني
أمانة عليكى يا غالية
تصونى القلب والننى
تصونى القلب والننى

74

غيروا بس الوشوش
فجأة دمي ..
رااااااح فاشوش .
قلت اروي بيه وريدك
لو تشاوري راح أزيدك
أزرع الورد في غيطانك
وامنع الشوك عن جمالك
مصر ياللي اتهد حيلك
دمعك الجاري في نيلك
غرقه من كام سنة
كنتي ناوية لنا الهنا
كنتي ناوية تبقي جنة
بالكرامة تضمنا..
الكرامة.... بح ماتت
والكفن مليان عفن
ريحته فاتحت
والورود المزروعين من دمنا

ريحتها راحت
حتى لو نها صار حزين...
لما شافوا دمعها...
يضوي ينور خدها..
قالوا ندئ!!!!!!
و الفقير مهما نده...
ما في حد يسمعه..
والكروش واقفه بعيد
لابسه م الوش الجديد
ويسألوا.....
إيه معانا بيوجعه؟
وليه عنيه بيدمعوا..
ليه يبص للقمه داخله ف بقنا
ونفسه فيها؟
طول عمره واخذع التراب
ياكل يسف
عقله ساعات ييقى دماغ...

وساعات يخف
يمشي يجري ف الحارات
يقعد يلف..
صوته مبحوح م النداء
والريق نشف
يزعق ويهتف
اكسروا القيد من إيدينا
عشنا طول العمر دايمًا
مش عبيد عند العسس
ليه نكون لعبة ف إيديهم
يكسروها لو تحس
لو هتنطق أو تقول..
مصر يا امه يا بهية
والعصابة هيه هيه
غيروا بس الوشوش
واللى زود لى المواجه
إن دمي راح فاشوش

أم

وتقهريني
 عرفت ازاي بتكسرنى
 وإن الفرح فإيدك
 وأحزانك تدمرنى
 وإن الضحكة مرهونة
 ببسماتك بتأسرنى
 يا وردة روتها من دمي
 وراح افديها بالنني
 ولو تطلب كمان مني
 حياتي.... مش خسارة فيك
 أنا يا بني غلبت اناديك
 حط ف قلبي أحزانك
 زرعت البهجة علشانك
 عشانك بس
 خدها وروح ..

يا روح الروح..
 بشوف دمك يحولني كما المدبوح
 ينقط دمي باتعذب لكن عمرى ما كنت أبوح
 لا يبجي الموت يخلصني
 و قلبي كله آه وجروح
 وإن الغالي يا غالي
 يا سندي .. يا كل راسمالي
 ما هو انت العز..
 وانت الوعد بالإنصاف
 ولما بخاف..
 تحاوطنى
 معاك كل الأمان والسعد
 ولو تبعد .. ده بعد الشر
 أنا راضية مادام الحب بيننا كبير
 هتبقى أمير
 على قلبي
 وليا الفخر.

متر ونص

ومش هتعب

هخلي الدنيا تستغرب

ولو يقرصني ميت عقرب

دي بخة سمه تحييني

ينادينني

بصوت خافت ماله الرعب

ما تحلمشي خروجك صعب

ولو حاول كبير أو شاب

باجيه بنظرة من عيني

يسلينني

ويا ظالم

أنا ف السجن مش خايف

مادام قابض على ديني

موّ عيني

وقال لي:

عيش كما الأحرار

ولو قادوا ف هدومك نار

حذار ف يوم تكون غدار

بلادك ندهت احميني

وإفدينني

ما ليش غيرك يا نور عيني

تعالى يا حر قويني

وكسر قيد بيدميني ..

وانا لبيّت

حرية

شباب رايحة شباب جاية
 فيران خايفة ومدارية
 وحتة جبنة تشبعهم
 خرابة راح تجمعهم
 شوية نور بتوجعهم
 تخوفهم...
 يقولوا عليها جنية
 ومخاوية...
 ويجروا دوغري ف جحورهم
 يجيبوا عيال وذرية..
 وأما الطير...
 ما يقدرش يعيش ف جحور
 ودايما بالسما مسحور

يعدي بلاد يعدي بحور
 عشان ما يعيش بحرية
 وبجناحه.....
 يلاقي اللقمة ملقية
 ماهوش خدام
 ولا عنده سواد نية
 وعاشق للهوا والضي
 وقلبه سليم
 ضميره حي
 تشوفه بعيد وهو جاي
 بتتبسم...
 وعطر كرامة تنسم
 ولما بصوته بيقسم
 يبص الكون..
 يقف ساكت يكون ممنون
 ويتعلم...

ولو تعبان بيتألم
ولو مخروس ما يتكلم
وراح ينطق...
ما هو المنطق
يقول الحر يفضل حر
ما عمره للقيود يعشق
ولما يشوفه يوم مظلوم
ده فيه دوغري بيتشعلق
دموعها تصب تترقق
ويهتف صوتها للمسجون
حرية.. حرية .
حرية.. حرية .

أسد

حمار فى القفص ..
شيطانه يوزّه ويعمل أسد
ويهتف سعادته
بقيت الملك
بقيت آه بجد
وجالى اللي راع
وجه من سجد
وناس تستعد
يبوسوا الأيدي
وناوين يكونوا دراع مين يهد
يحبوا المذلة
بلقمة فى حلة... يبيعوا البلد
وكل اللي جنبه يقول له اصحى

سعادة الأسد..

ولو سلسلوه برضه يفضل أسد

ولو عاش حياته في ظلم وكبد

هيفضل أسد..

وأما الحمار..

ومهما هينصف كبيره الغبار

يمرّغ ف جسمه..

وبرضه دا اسمه

هيفضل سيادته

سعادة.. حمااa

وبتألم....

وبتألم....

وماشية طريقي لو ضلّ

ضيا قلبي يكفيني

وهتكلم..

ولو ضربوني بالمدفع..

ولا في الكون دا شيء ينفع..

يسكتني..

أنا روعي دي نسماية

ولو حكمت هكون راية..

وهفضل رافعه راسي لفوق

ولا أحنيتها في يوم لجبان

خلاص فاضت....بنا الأحران

ما انا عارفة..

بإن الضلمة لو طالت
 وحتى نجومها لو غابت ..
 فـ يوم لازم ..
 شعاع الشمس هينور
 وهيشور ...
 على الأرض اللي كانت بور
 هيكسيها دفاه بالنور ..
 ويملاها ورود وزهور
 أنا يا ناس مانيش خايقة ..
 ما انا حالفه ..
 لكسر خوفي بوقوفي
 وجبروتي ..
 هيهزم كل من باعوا
 وهارجع ..
 أقوى م الأول
 وهاستحمل ...
 عشان بكره يكون أجمل

وحشتيني

وحشتيني يا ست الكل
 يا ضليلة بورد وفل
 يا كحلة مكحلة عيوننا
 تخلي الكون بيتغنى
 بأشعارك
 يا حلوة يا ساحرة زوارك
 وحشتيني
 وحشني البسمة ف عيونك
 وحشني النور مالي جبينك
 وحشني توبك الألوان
 مطرز خير كثير وحنان
 وفين أهلك؟
 وفين تاهوا ..

ف شرايينك

وعاشقينك....

وحاميينك... بأرواحهم

وناس تجري على جرحك

وبدماهم فدوا دمك

وشالوا ياما من همك

وعمر ف يوم ما خاب ظنك

ف أولادك

وحسادك.....

واكلهم غل

ومن كرهك إيديه تتشل

عاوزنا نعيش ف قهر وذل

وقال باعت هدوم بالة

باعط بطاطين!!

باعطها لمين؟

دا كل إخواتي رجالة

يا عم الراعي دا المصري

راجل واعي راجل أصلي

راجل لو حتى شح المال

راجل لو حتى بخته مال

بيتعدل...

وعمره ف يوم ما يتبدل

وطول عمر التراب ف ايديه

بيتحول...

دهب خالص

عنوانی

وباقبلکم.....

ورافضنی

وشایفکم...

وناکرینی

وراضی نعیش سوا شُرکا

هنا فی وطنی

ولیه انتم مباعدینی

ومش راح اسیبها أوطانی

ولا راح اطیع لسجانی

ومش هاسمع أوامرکم

وتفضل مصر عنوانی

أنا العامل... أنا الباني

أنا الدكتور ما نیش جانی

مانیش حاقد ولا أنانی

أنا اللي هتيجوا قدامي

تقولوا تعالى نتصالح

أوافق....

ما انتوا إخواني

ومصر كبيرة وتساعنا

بقلب كبير يجمعنا

ومين ناوي يضيعنا

ومين دبّح ف إخواننا

ومين غرق أراضينا

بدم شهيد يفيدينا..

مالهش مكان هنا بيننا

يروح يبعد بعيد عنا

وتفضل مصر عنواننا

برد

يا ليلنا الطويل
 يساكن قلوبنا بقالك زمن
 لا فجر ك يطلع بلحظة أمل
 ولا شفنا شمسك علينا تطل
 تدفي وريدنا اللي ساكنه الشجن
 وساكنه الجليد
 وساكنه الألم
 وساكن حياتنا وكل الرؤوس
 لقيتك كابوس
 قلوب من حديد
 بتخطف من القلب فرحه البعيد
 بتبدر وتزرع آمالها ف حياتنا
 وناوية تكملها حتى ف مماتنا
 وآه يا بدن

يا ساكنه الوجد
 ومهما اتفجع
 ف كل الأماني
 وكل الخلايق
 يا نسمة يا طيره تنتور تهانى
 وتنشر دفا
 في حلم اختفى
 وروحي تهيم
 ف وسط النسيم
 يصيبها شعاع شمس
 تدفي شويه
 وتفضل تغني لوردة ندية
 تخاف يقطفوها
 ماهي وانا
 نعيش حاجة واحدة
 وتجمعنا وحدة
 وبرد وألم

الفهرس

5	حرف سَكِينَة
8	أصل
9	عِيْلَة
11	قطع خيوط الشرنقة
12	غريبة
13	قرار
16	وردة
18	هموم
19	نصيحة
21	ليه؟!
23	يا رب
24	عزة
25	مصر
26	ماراثون
29	قلبي انفطر
30	وتللم
32	وفرقتنا
34	سكوت
36	شعاع شمس
38	حر
39	شبابيك
41	ورقه وقلم

44	ربك مُطْلَع للغلبان
47	عميان
48	هتفرج
50	نسب
52	لامؤاخذة
54	تاج
57	أخويا
58	هتفرج
60	ضنا
61	أمان
62	راضيين
64	هنا
65	مواجه؟
66	يا أمّه
69	راضي
71	أمانة عليكى
73	بهيه
77	أم
79	متر و نص
81	حرية
84	أسد
86	وبتألم
88	وحشتينى
91	عنوانى
93	برد
95	الفهرس